

Embargo: Hanya boleh diterbitkan atau disebarikan mulai jam 1200, Isnin, 10 Februari 2025



KENYATAAN MEDIA

KEMENTERIAN EKONOMI
JABATAN PERANGKAAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

STATISTIK PEMBINAAN SUKU TAHUNAN, MALAYSIA SUKU KEEMPAT 2024

Nilai kerja pembinaan mencapai RM158.8 bilion, mencatatkan pertumbuhan dua digit sebanyak 20.2 peratus pada 2024

PUTRAJAYA, 10 FEBRUARI 2025 – Nilai kerja pembinaan tahun 2024 mencapai RM158.8 bilion, dengan suku keempat 2024 berjumlah RM42.0 bilion. Jabatan Perangkaan Malaysia (DOSM) melaporkan hari ini dalam keluaran **Statistik Pembinaan Suku Tahunan, Malaysia, Suku Keempat 2024**.

Mengulas mengenai laporan prestasi terkini sektor Pembinaan, Ketua Perangkawan Malaysia, Dato' Sri Dr. Mohd Uzir Mahidin berkata, "Nilai kerja pembinaan dalam sektor ini terus mencatatkan pertumbuhan pada suku keempat 2024 dengan peningkatan ketara sebanyak 23.1 peratus (ST3 2024: 22.9%). Prestasi yang memberangsangkan ini didorong terutamanya oleh peningkatan kukuh dalam subsektor Aktiviti pertukangan khas dan Bangunan kediaman, yang masing-masing mencatatkan pertumbuhan dua digit yang ketara sebanyak 44.9 peratus dan 38.9 peratus. Subsektor Bangunan bukan kediaman turut menyumbang kepada pertumbuhan dengan peningkatan sebanyak 24.6 peratus. Sementara itu, subsektor Kejuruteraan awam terus berkembang, walaupun pada kadar yang lebih perlahan, dengan kadar pertumbuhan positif sebanyak 9.3 peratus".

Ketua Perangkawan mengulas lanjut, "Daripada keseluruhan nilai kerja sebanyak RM42.0 bilion yang dicatatkan pada suku keempat 2024, sejumlah RM15.6 bilion atau 37.2 peratus disumbangkan oleh subsektor Kejuruteraan awam, terutamanya dalam aktiviti Pembinaan jalan raya dan landasan kereta api (RM6.9 bilion) dan projek utiliti (RM6.8 bilion). Sementara itu, nilai kerja bagi Bangunan bukan kediaman dan Bangunan kediaman masing-masing mencatatkan RM11.8 bilion (28.0%) dan RM9.9 bilion (23.5%). Aktiviti pertukangan khas pula menyumbang RM4.7 bilion

(11.3%), terutama dalam aktiviti Penyediaan tapak (RM1.2 bilion); Pemasangan elektrik (RM1.1 bilion); dan Pemasangan paip, pemanasan dan penghawa dingin (RM1.0 bilion)".

Sektor swasta kekal sebagai pemacu utama pertumbuhan pada suku ini, menyumbang RM27.0 bilion atau 64.2 peratus daripada jumlah nilai kerja Pembinaan. Sektor swasta mencatatkan pertumbuhan yang ketara sebanyak 32.9 peratus (ST3 2024: 33.3%), didorong oleh prestasi kukuh dalam subsektor Aktiviti pertukangan khas (57.4%) dan Bangunan kediaman (38.5%). Sebaliknya, sektor awam yang menyumbang 35.8 peratus atau RM15.1 bilion mencatatkan pertumbuhan yang lebih perlahan sebanyak 8.8 peratus (ST3 2024: 8.1%). Pertumbuhan ini didorong oleh subsektor Bangunan kediaman (46.8%) dan Aktiviti pertukangan khas (22.4%), dengan masing-masing berjumlah RM0.6 bilion dan RM1.4 bilion.


Mengulas mengenai prestasi sektor Pembinaan mengikut negeri pada suku keempat 2024, Dato' Sri Dr. Mohd Uzir Mahidin menyatakan, "Hampir 62.3 peratus daripada nilai kerja tertumpu di Selangor, Johor, Wilayah Persekutuan (Kuala Lumpur, Putrajaya dan Labuan) dan Sarawak. Selangor merekodkan nilai kerja Pembinaan tertinggi sebanyak RM9.4 bilion (22.5%), didorong oleh subsektor Bangunan bukan kediaman dan Bangunan kediaman yang masing-masing bernilai RM2.9 bilion, serta subsektor kejuruteraan awam berjumlah RM2.6 bilion. Sementara itu, Johor menduduki tempat kedua dengan RM7.4 bilion atau 17.7 peratus, dipacu terutamanya oleh subsektor Bangunan bukan kediaman (RM3.0 bilion). Di samping itu, nilai kerja Pembinaan di Wilayah Persekutuan berjumlah RM4.7 bilion (11.3%), manakala Sarawak mencatatkan RM4.6 bilion (10.9%)."

Merumuskan prestasi nilai kerja pembinaan bagi tahun 2024, sektor ini mencapai RM158.8 bilion, mencatatkan pertumbuhan dua digit sebanyak 20.2 peratus berbanding 8.4 peratus pada tahun sebelumnya. Ke semua subsektor menunjukkan peningkatan, dengan lonjakan ketara dalam Aktiviti pertukangan khas (35.9%), Bangunan kediaman (24.5%) dan Bangunan bukan kediaman (15.5%). Sementara itu, aktiviti Kejuruteraan awam mengekalkan pertumbuhan dua digit yang stabil pada kadar 17.3 peratus (ST3 2024: 15.7%). Secara keseluruhannya, sektor Pembinaan Malaysia pada tahun 2024 menunjukkan prestasi yang kukuh, disokong oleh pertumbuhan yang meningkat ke semua subsektor.


Jabatan Perangkaan Malaysia (DOSM) telah melancarkan OpenDOSM NextGen sebagai medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Kerajaan Malaysia telah mengisytiharkan Hari Statistik Negara (MyStats Day) pada 20 Oktober. Tema sambutan MyStats Day adalah “Statistik Nadi Kehidupan”.


Carta 1: Nilai Kerja Pembinaan dan Perubahan Peratus, ST1 2022 - ST4 2024




Carta 2: Nilai Kerja Pembinaan dan Perubahan Peratus mengikut subsektor Bangunan kediaman, ST1 2022 - ST4 2024




**Carta 3: Nilai Kerja Pembinaan dan Perubahan Peratus mengikut subsektor
Bangunan bukan kediaman, ST1 2022 - ST4 2024**



**Carta 4: Nilai Kerja Pembinaan dan Perubahan Peratus mengikut subsektor
Kejuruteraan awam, ST1 2022 - ST4 2024**



**Carta 5: Nilai Kerja Pembinaan dan Perubahan Peratus mengikut subsektor
Aktiviti pertukangan khas, ST1 2022 - ST4 2024**



Carta 6: Nilai Kerja Pembinaan dan Perubahan Peratus, 2015 – 2024



Dikeluarkan oleh:

**PEJABAT KETUA PERANGKAWAN MALAYSIA
JABATAN PERANGKAAN MALAYSIA
10 FEBRUARI 2025**